


8

НАУРЫЗ



Сіздерді көктеммен бірге келетін тамаша мейрам — Халықаралық әйелдер күнімен құттықтаймын!

Асыл анасын сыйлайтын, қамқор әпкесін құрметтейтін, тілеулес қарындасын қадірлейтін және өзінің сүйікті жары мен қызын жанындай жақсы көретін адамдардың бәрі бүгінгі күні ерекше күйге бөленіп, қымбат қазыналарына құрмет пен ілтипат білдіруге тырысады.

Ақ жаулықты аналарымыз еріне – тірек, ел бірлігіне тұтқа болған. Көкжиектен тамыр тартқан тарихи оқиғаларға зер салсақ, біздің қыздарымыз адалдық пен сұлулықтың, батырлық пен ерліктің өшпес өнегесін көрсеткен. Халқымызда «Ананың ақ сүтін адал емген» деген қанатты сөз бар. Мұның мағынасы өте терең. Мазмұны жан-жақты. Жер бетіндегі тіршілік күннің көзінен нәр алса, адам баласы ананың сүтінен қуат алады.

“Отан отбасынан басталады” дейді дана халқымыз. Ал отбасының ұйытқысы, «Ақ бесіктің иесі, туған жердің

киесі» - алтын жүрек аналарымыз. Олар халқымыздың ең құнды қазынасы боп саналады. Ана алдында бас имейтін жан жоқ. Өйткені, ананың жүрегі нәзік, рухы мықты.

Жаңа дәуірде Қазақстанның дүние жүзіндегі дамыған мемлекеттермен терезесі тең болып, гүлденуіне елеулі үлес қосқан қайраткер аналарымызды, апа-қарындастарымызды біз ерекше мақтан етеміз. Қазақстандық әйелдер билік пен бизнес, ғылым мен мәдениетте ерекше қабілетімен танылуда. Олардың бойында шығыс мәдениетіне тән нәзіктік пен ұстамдылық, батыс өркениетіне тән ой тәуелсіздігі мен еркіндік бар. Елбасының «Әйел - өмір тірегі ғана емес, әйел - өмірдің өзі» деп атап өтуі зор сүйіспеншілік туғызады. Қазіргі кезде қоғамдық өмірдің кез келген саласын әйелдерсіз елестету мүмкін емес. Олар – геолог, олар – археолог, олар – педагог, олар – дәрігер, олар – құрылысшы, олар – металлург...

Сіздер адал жар, қамқор ана, сенімді дос қана емес, сонымен бірге жақсы басшы, білікті маман, іскер ұйымдастырушы болып, жалпы алғанда, жаңа заманға сай қызмет атқарып жүрсіздер. Мереке құтты болсын! Айтулы мерекеде Сіздерге зор денсаулық, жақсылық, сәттілік тілеймін! Бейбітшілік пен келісім, түсіністік пен қуаныш қашан да жандарыңыздан табылсын!

Жұмахан Үшкөмірұлы МЫРХАЛЫҚОВ, М.Әуезов атындағы ОҚМУ-дың ректоры, ҚР Ұлттық инженерлік академиясының корреспондент-мүшесі, техника ғылымдарының докторы, ҚР Ұлттық Академиясының корреспондент-мүшесі, профессор